

# INUIT ATAQATIGIIT

## Inatsisartuni



17. september 2018

Inatsisartut Suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara.

### Naalakkersuisunut apeqquq:

1. Nunatsinni kræftimik nappaateqarnermikkut toqquteqartartut amerlassusaasa Nunani Avannarlernituut appasitsigilersinnissaat anguniarlugu Peqqinnissamut Naalakkersuisoq piffissami qaninnerpaami qanoq suliniuteqalersaarpat?
2. Nunatsinni kræftimik toqquteqarnermikkut toqquteqartut amerlassusaasa Nunani Avannarlernituut appasitsigilissappat suliniutit suut pisariaqarpat?
3. Kræfteqartunik katsorsaasarneq eqqarsaatigalugu Nunatsinni peqqinnissamik sullissinerup Qallunaat Nunaanni peqqinnissaqarfiup sullissineratut pitsaassuseqalissappat, qanoq suullu pitsanngorsarneqartariaqarpat?
4. Kræfteqartunik katsorsaasarneq eqqarsaatigalugu Nunatsinni peqqinnissaqarfik Qallunaat Nunaannisulli pitsaassuseqalissappat peqqinnissaqarfimmut aningaasaliissutit qanoq amerlatigisunik ilaneqartariaqassappat?

(Inatsisartunut ilaasortaq Sofia Geisler, Inuit Ataqatigiit)

### Tungavilersuut:

Nunatsinni nappaassuarmik kræftimik nappaateqarneq pissutigalugu toqquteqartarneq nunani avannarlernut allanut sanilliullugu marloriaataasoq ilisimatusarnikkut misissuinerup inernerata sapaatip akunnerata siuliani tamanut tusarliunneqartup takutipkaa.

Nappaassuarmik kræftimik toqusartut taamak amerlatiginerat qisuariarfigalugu Peqqinnissamut Naalakkersuisup oqaatigaa kisitsisit appartinneqarnissaannut pinaveersaartitsineq aqqutissaasoq. Pinaveersaartitsineq soorunami pisariaqarpoq, taamaattoq pinaveersaartitsineq kisimi aqqutigineqassappat taassuma sunniutai aatsaat ukiut 15-25 qaangiuppata malunnarsissapput, taamaammallu paaserusuppara Naalakkersuisup piffissami qaninnerpaami kisitsisit appartinnissaat anguniarlugu qanoq sulerialersaarnersoq.

Apeqququma ullut suliffiit qulit iluanni akineqarnissaat qinnutigaara.